

四庫全書

集部

欽定四庫全書

清江三孔集卷四

宋 孔武仲 撰

古詩

馬齧麥

馬齧麥僕飲水北風軒軒搖丘林霖霖十日吁可驚南山喜  
見朝日升尋陽北岸霜泥薄窮臘獨為千里行五里聊  
一止十里復一息揚柳弄輕黃已作春顏色川原入眼

雖似快時節去家還可惜蓄麥不須飽飲冰勿畏寒起  
鞭移擔復五里帝鄉即在湏臾間悠哉役夫勉桓桓征  
途幾何莫永嘆亦莫悲歌行路難

兒歸行

竹元珍云澤州山中暮春之月有烏啼曰兒歸者其  
聲甚哀問之鄉民云昔有里婦愛其子而憎前室之  
子欲逐之未有計乃于種麻時熟其半生其半使二  
子分種曰麻生乃得歸而誤以熟者與已子久之所

惡之子歸而已子不返往視之則已化為飛禽啼曰  
兒歸今鄉人以為種麻之時候余以謂人之愛憎藏  
乎胸中陰謀所發乃在分種之際而心手倒錯事與  
願違朝人暮禽子母生隔似有巧者主張斡旋于冥  
冥之間天網雖疎其應甚密則夫為人上而接其下  
用心積慮可不戒哉又知天之所以垂戒示迹于人  
者殆將使之推類以自廣非獨此一女子也乃作詩  
以紀之

兒歸兒不歸朝為子母歡暮為禽鳥飛故居不得返深  
林安可依此身寂寞已如此我母在家應憶子子今豈  
不思其親空有舊心無舊身兒歸兒不歸春已暮朝多  
風夕多雨山雖有泉隴有黍兒寒有誰訴兒饑與誰語  
萬物卵翼皆相隨兒今不得兒子母兒歸兒不歸年年  
三月種麻時此聲煩且悲聞昔一母生兩兒于已所生  
獨愛之麻生指作還家期惟憎者來愛者去物理反覆  
不可知天公豈欲故如此善惡報敏如墳箎至今哀怨

留空山長為鑿戒子母間豈獨行客愁心顏兒歸摧痛  
傷心肝

健兒走馬行

天街極目如平水健兒走馬天街裏南宮宴罷晚色深  
宿雨初乾塵不起羅巾滿插漢京花雕鞍一簇濃如霞  
千蹄撇過在頃刻閃電飛星不留迹路旁看者如堵墻  
街使傳呼俱辟易朝家和戎七十年隻矢不射塞外天  
爾曹不必夸馳騁官家無意窺幽燕穩將金帛北歸去

萬歲千秋祝明主  
氈車蒲野春草長  
任爾初連山下住  
昨日之日行

昨日之日嗟可憂  
羣山積雨漫溪流  
行人兩兩相負過  
雖有橋梁如拍浮  
南歸童僕皆賈勇  
濶步豈顧川無舟  
狂瀾更與人爭力  
一跌性命甘長休  
乘險徼幸乃無患  
作客如此真何求  
今日之日却優游  
青天挂幕陰霾收  
朝陽透射烏鳥樂  
宿潦平帖蛟龍愁  
新花芳草色鮮瑩  
時而殷紅垂石榴  
風景清曠亦可嘉  
旅衣酸寒馬足羞

岡原漸高沮洳濕此行應快無遲留

車家行

上坂車聲遲下坂車聲快遲如鬼語相喧啾快如溪沙  
瀉鳴瀨一車人十捧擁行江南江北不計程青天白日  
有時住無人止得車輪聲晚來驟雨聲濯濯平曉郊原  
盡溝壑方悟車家進退難不如田家四時樂

猗猗堂下竹

猗猗堂下竹我來初萌芽生意甚蹇薄纔能出泥沙狂



霖一夕作霹靂連轟車回首未幾日其成何速耶修然  
數尺高秀色蔚以佳餘陰過盆池喜躍見魚鮭乃知地  
道敏不待歲月賒念彼遠遊子聯翩入京華勢利勇奔  
趨被服爭豪華外雖逐喜好顧盼相陵夸中乃昏智識  
有損無增加曾竹之不如徒比草木花經風已簸落枯  
槁良可嗟而我方涉世浩渺無津涯因竹亦自悟慨歌

牕日斜

白湖泥

昔浮洞庭浪今踏白湖泥水陸雖異趣客程皆嶮巖浮  
身無根株轉徙長路歧嘗聞昔人言欲以瓦為衣風雨  
輒不出華堂安所栖我今南復北擾擾亦奚為行役衆  
所同浩歌聊自怡

道中觀荷花

放棹東南去正值荷花榮玉質不待染仙香無限清朱  
朱仍白白脉脉復盈盈迢遞天風起誰憐舞態輕

與廖開甫自淮南同行赴舉相別五年復相遇於

蘄水縣為詩贈之

東書吾初走夷門，傾蓋得君恨不早。  
蘭溪駐馬復相逢，二紀飛馳如電掃。  
惜君憔悴力不任，顧我滄浪髮先皓。  
憶昔同行氣頗驕，青驄馬快鞍韉好。  
荒山破屋風豪橫，大澤長堂雪傾倒。  
高談洒落見天機，健句縱橫瀉腹藁。  
辛勤始得到京邑，文辭不入春官考。  
可憐六駟委沙泥，坐看群仙上蓬島。  
壯年多難寸心折，勁鏃已哀難破縞。  
而君施設有餘才，西佐元戎奪城堡。  
牛刀拂拭試一縣。

如引滄浪灌行潦歸來赴愬天子庭正欲披腹呈瑰寶  
片辭未吐疾先入藜杖扶行色枯槁籃輿復指天涯去  
長川橫濫聲浩浩驛驢不日歸王閑那久低摧卧霜草

久長驛書事

空堂深深閃燈燭羣奴鼾眠聲動屋豆肥草軟馬亦便  
嚼美只如蠶上簇天事由來不可量初更月出星煌煌  
須臾變作霏霏雨客枕不眠知夜長

故縣作

促促遠行役勞勞羣僕夫上漂以霖雨下濺以泥塗寒  
入骨脛裂潤兼巾裳汚行路何其難我馬亦已瘡逢人  
問前舍指點山墻孤投得數間屋慘寂日已晡橫流正  
浩蕩驚飈尚號呼篝火就空室排入如鷺雛投醪不及  
均自酌以為娛

白砂驛作

浮雲紛紛鑠太清驟雨肅肅飛中庭冰蓋脫粟冷徹骨  
欲語寂然誰和應辭家十日心甚壯今日始覺愁腸并

僕夫聚首亦不樂泥深灘密尤難行長途何意此艱險  
彼蒼其誰司晦明閉門篝燈夜未久試遶前楹望星斗  
頑陰稍散避青冥白月飛光臨戶牖推移變態俄頃間  
坐使慘寂成歡顏群奴喧喧亦相語明日快馬臨關山  
陰亦不可知晴亦不可必爾曹穩眠莫匆匆清明更待  
東方白

題鮑家鋪

郵亭秣馬朝寒天雪雲壓山山湧泉隴頭客飢欲噤口

屋底人間猶鼯眠敲門得薪感相濟征衫如洗賴火然  
江南亦有安栖處却羨郵亭人穩住

發光山

搖搖春霜草頭白冰如龍蛇當轍迹天開日麗非偶然  
昨夜滿山明月色憶昨北走關山中下坂還登百千尺  
狂風虛霰何可當破碎貂狐作巾幘今朝驛道千里平  
而況六幘俱空明昔何艱險此何易付予榮枯豈天意  
人心既好馬亦驕騰韜蓄響鳴蕭蕭我今亦復歌且謠

惠相好者同遊遨相與馳君之樂郊從此不嗟衝涉勞  
至趙莊鎮捨轎乘馬二首

淮康望夷門驛舍猶六七我車嗟已勞我馬亦太逸朝  
來天色好輝煥川上日郊原莽而蒼生意密如櫛農殮  
頗順適晝氣更盈溢摳衣就鞍韉前引以一卒馳提歷  
灣紆林木榮棗栗豁然就平曠天壤合為一稍過王務  
陂陂長水波濶驚風搖澎湃鳧鴨語啾唧却思在江湖  
雙鶻更輕疾川陸雖不同吾心兩無必匆匆背鄉井瑣



瑣干祿秩功名未及試行役甘于窳安得擺羈牽優游  
老蓬華

晴郊漠漠翠烟浮乘興閒登棗下騶風色斗回成凜冽  
却添貂帽擁駝裘

舍轎馬而步

嚴風駕雪霜吾轎頗溫燠白日煖郊原吾馬快馳逐二  
者皆得用翩如兩黃鵠馬驕倦提策轎狹厭攣束何以  
救斯弊奔馳有吾足副之兩革靴隨以一筇竹鳧趨上

高岡虎步出平陸折花得低枝照影臨深谷道逢田間  
叟時訪以耕牧北音稍入耳俚語俄滿腹行行及前堆  
小汗已霖霖芳草可為茵吾眠不須褥人生忌太佚終  
歲居華屋醉飽耳目昏軟暖筋骸縮今吾異于此千里  
干微祿朝隨麀麀騁夜侶鴻鴈宿戶樞勞乃久金礦鍛  
方熟聊歌以自娛不作揚朱哭

江晦叔見訪于興國寺見庭中修竹兩竿云竹雖  
不多而蕭騷可愛因贈之詩

憶昨在江都聯君城一曲我家百色無唯有數竿竹琅  
玕淨相倚蕭灑意常足君亦時見過笑語伴幽獨別來  
七見春屢送光景速京師車馬煩高塵蔽華屋僧室日  
閉關靜若在巖谷忽聞剝啄聲把手叙寒燠嵌空疊石  
畔亦有雙筠綠動君青雲興賞眇不移目愛其蕭騷風  
搖此蒼翠玉有如嗜膾炙久矣虛其腹一旦逢割鮮欣  
然喜如沃乃知物外適可以做流俗奉常官事簡佳集  
時可卜軒窓闢深邃冠帶脫拘束文枰稍拂拭白黑看

馳逐更設茶兩旗何須酒百斛

寄經父兄

我出亂山來兄入亂山去出山何必佳匹馬紅塵路入  
山勿辭勤崎嶇與天鄰天門西北去石眼行車輪落盡  
江南柳塞榆應知春去去何時歸天涯可寄衣霜高鴻  
鴈還無使信音稀

大風

昔遊江湖上厭看無限不測之高浪今栖塵土中慣聽

掀天拔木之狂風風豪浪狠常相逐我生此世宜阨窮  
浪頭漫漫從海起客舟搖戰如枯葦回棹轉尾入深灣  
往往三分偷得一分睡豈如秋宜門東僦屋居突兀前  
堂掌平地風從崑崙溟渤來平頭疾轉數千里金鋒相  
磨衆鬼兵介馬爭先萬胡騎搯搶震壓尤可驚千妖百  
怪悲號聲我時安眠不覺躍然起爐烟寂滅燈冥冥褰  
衣正欲走出戶戶未開扃已吹仆閉門正欲避風來風  
入衣襟不肯去天涯地角兩茫茫一身渾無逃遁處明

朝檢點牕戶間浮埃委積如丘山遙知九衢中馬走廢  
往還我欲投書訴風伯帝閤峩峩不可攀怒攜干將遶  
四壁空有壯氣膨心肝頗疑猛虎嘯林薄慘淡陰威動  
寥廓又疑土伯夜與風神爭叱咤啞啞騁獍惡明當折  
簡問巫陽天上誰人司索籥

數詩分題

一邑臨襄漢青衫正少年二毛侵鬢髮披霧始窺天三  
接龍光遠瞳矐白日邊四門方雜還羔鴈賁林泉五斗

安徽祿雖貧志浩然六韜聊自試有策佐平燕七札穿  
強弩諸君必凱旋八荒馳貢篚恩旨罷戈鋌九九期君  
用慙非命世賢十官何敢望於此卜歸田

又

一樽勸君飲舉觴莫遲遲二月風景妍都人正游嬉三  
春已失一胡不惜芳時四郊更清曠紅紫耀漣漪五侯  
盛供帳出以歌鼓隨六龍西翺翔迅速不可追七澤起  
悲風晚景含崦嵫八音莫停奏妙舞隨金絲九門稍合

鑰莫時淚沾衣十里燈燭光醉矣各還歸

招竹元珍賞江洲新茶

我生世味薄所好唯真茶江南隔浮雲廬岳望苦賒煎  
烹逐風土白水脂麻有客自遠至開緘得新芽乍見  
真邂逅失喜成謹譁掬視未及飲清香破昏邪堂堂京  
邑雄萬貨來天涯念此至靈草崎嶇亦隨車小磨元自  
攜瑩白無纖瑕玉塵漸委積鷹嘴猶交加汲泉方汙埃  
上以密葉遮蟹眼已鳴沸君來何晚耶相呼共一啜如



到神仙家煩襟得浣濯兩目祛昏花閒居無他樂賴有  
此趣佳煌煌金張門酒肉爭豪奢冷淡不輒飲千金賞  
箏琶一醒又五斗顏角如烘霞蔗漿爽肺肝金椀嗽齒  
牙坐覘吾曹癖往往笑以嗟人生樂不同未用相矜夸  
吟罷腹饑吼空庭噪昏鴉

廣津倉檢視斛斗

長渠西來擬天漢千里清陰綠楊岸高墉傑屋如屯雲  
碧瓦參差插天半小樓三尺偷晨光山低堆積白與黃

千艘一卸須臾了江湖極目來帆檣國家稅法擬前古  
還以養人非自富連雲碧射皆貌貅月稟太倉急風雨  
歲深敝積如鼠穴檢視之官緣此設我初受牒頗激昂  
匹馬朝朝踏殘月千籌簇簇來如林袍鞞兀坐清槐陰  
秋毫增損必拘送莫怨小官持法深吾槩視此平如水  
運量四海亦如此今朝且佐大司農他時敢獻明天子

送元珍赴官合州

羈旅倦京國春風常閉門叩門誰過我云是竹王孫頗

然八尺長玉質文理溫探之以羣書浩渺傾崑崙餘波  
濯我熱挹取不計盆朝落清風窻暮埽明月軒傲兀足  
真趣不隨車馬喧動可與俱遊靜可與忘言胡為捨我  
去獨指岷江源偪側鳳翔西疊嶺如駿奔滔滔蜀天漏  
沉沉山月昏到官復何時清秋禾黍翻冷局自少責讀  
書勿志餐登臨時自適吟思攬乾坤魚鴈若可託篇詩  
寄湘沅

送李大夫管勾太平宮居袁州

康定慶厯披羣英公為布衣歌太平熙寧元豐王道興  
公作太守逢休明四十年間走四海岷然不肯干公卿  
峩峩正議天柱壯皎皎素節冰壺清胸中慨慷外間易  
年高未見白髮生罷節巴陵歸意銳奈何去就不敢輕  
馳歸天寵乞閒散諸郎惜祿猶屢爭毅然不與兒女計  
飛章丹宸論赤誠明朝果得琳宮去匡廬山色遙相迎  
玉溪氣象自瀟灑新磨古鏡當霄橫修篁萬竿飽霜雪  
枯棋一局酒滿觥時邀賓朋叙野史間擁雪鶴登岩扃

妄排丹鼎夜不寐邂逅黃金燒可成未應謝傳入滄海  
行見盧敖朝玉京

代簡別林次中

常思洞庭湖夢想東南游浩渺七百里控帶三五州靈  
霖稍開霽萬頃涵新秋此時登臨勢併在岳陽樓水天  
兩琉璃瑩濶相沉浮爽氣動林木無風亦颭颭願言追  
壯觀兩槳推輕舟何異泛滄海便可掛浮丘前日到君  
家日暮空回舟徑遣長鬚來見邀頗綢繆謂此千里別

一散未易收相去况咫尺能上河梁不顧我行役長感  
君風義適好在更加殮行子不可留

代簡答次中見留

詩誇洞庭湖蓋舉其麤爾自此稍南行更有瀟湘水瀟  
湘如此流淺深清見底吾邑在其旁桑麻百餘里民經  
南巡後淳龐猶可喜白酒日相沽鱸魚夜成市念方從  
吏隱小官不為耻先期了賦租隨時用鞭箠此外無餘  
事看山聊隱几還作小詩篇寄聲前御史御史吾故人

風義今為偉超遷未復甚久仆行復起但使交期在不  
須論遠邇今夕宿朱仙相望月明裏

時雨

空車輾雷幟推電千里冥冥甘雨遍元豐嘉號卜長年  
太乙尊神宅畿甸齋宮夜禱天俯聽美澤朝流慰人願  
豆苗蓬蓬粟低垂土脉舒蘇蝗不飛野老謳歌忘帝力  
夕陽相與荷鋤歸

雨中

大雨已滂流，小雨仍霖霖。風來掃欲斷，雲送還相續。凝陰壓天宇，蒸潤浸旅服。隴上麥經秋，江南梅已熟。

蔡州三首

愁雲昏昏掩六月，電光霍霍盤四隅。淮西一雨三晝夜，長瀾積潦無處無。試登高樓望四野，平田渺渺成江湖。山源奔溢來處遠，晨朝又報高丈餘。重圍閉築僅自守，一帶縈疊何其孤。頽墻處處若山壞，百舍相望無完區。辛勤買得稻一束，馬饑况乏粟與芻。三十年間走四方，



始遭此厄真窮途踰居丘亭往來斷時起顧是青雲衢  
如絲一罅見天面頑陰復起相糝糊幽憂填胸不自遣  
強扣瓦缶傾殘壺醉中暫爾神氣王醒定更覺心摧枯  
城陰老蛙正逸樂聲如轉軸相嗚呼強弓毒矢未易射  
欲殺唯有企翁符吾家此去八十驛愁來更展江湖圖

又

狂霖出羣山夜半擊堤口水橫溢陵阿餘波猶怒吼東  
村五百戶一塌如摧朽碑兀聲如雷牛馬不及走壯者

上枝柯幼子浮嬰缶驚逐吞天瀾兒猶闖其母旁人避  
形迹晚視誰敢救凍餒何足言餘生豈能久人云淮西  
水如此昔未有我生真厄窮出與此災偶晨興得枯槎  
泛若上牛斗獨濟恐難安人危敢援手

又

行路難歸去來三日汝南城不開天角隱隱聞輕雷掣  
電更劃劃猛雨還漼漼稍添汪汪陂漸淹高高臺我欲  
晨興出南郭極目唯有白水漫蒿萊驛道安在哉連山

湫流相喧，厖父母不復顧。嬰孩棄之如塵埃，戢戢生魚頭。人世永隔良可哀，清都咫尺可以訴。誰挽北斗魁，嗚呼行路之難，邦人之災。

劉公詩 并序

吾鄉劉原甫，雄文博學為天下師表。四方士大夫登其門，執弟子禮者足相踵也。而余不及識。今識其子仲馮，仲馮居省中，治事精密，吏不能欺，應接不倦。甚得士大夫心，天下稱為賢吏。部其文學議論，能世其

家余自京師南出過鄔陵興國寺入金剛院見原甫  
判蔡州時題詩四句在壁曰寂寞空堂欲暮時鐘聲  
斷續雨千絲此中會有西來意正復庭前柏樹知乃  
錄以寄仲馮請附入家集中因為詩道原甫平生以  
見余愛慕之心云

原甫吾不識聞之士大夫少時已絕羣卓犖千里駒讀  
書足智慮萬卷力有餘善發六藝蘊高談詆先儒天文  
地理學道藏及浮屠纖悉無不講講之皆粲如文章弄

豪膽咳唾王與珠散落八極間買者論錙銖為人又挺  
特不與俠者俱伉健虎獨步軒昂鶴仍孤身雖登兩禁  
未及秉鈞樞爽氣隨沆瀣斂收入清都嗟嗟劉夫子信  
是荀揚徒富貴非窮愁而復多著書荒城過宿雨古寺  
入平蕪鬱鬱壁上詩奎鈞照天衢我來值日暮篝火為  
踟躕想見其風骨磊落眉宇踈邦人好事少不以玉石  
摹歲月更久遠彫摧逐泥塗作詩貴述美聊用贊不渝

入關山

輕輿兀兀乘朝暉漸入山徑行逶迤昨日喜與山相見  
今日得與山相隨山中老翁迎我笑借問久矣來何遲  
答云王都富且樂四方車馬皆奔馳我雖踈慵亦勉強  
天恩得邑方南歸山林朝市不同調公雖高簡宜無譏  
老翁聞語更驩意為我煮水燒松枝山家十錢得升酒  
勸我引觴聊沃飢為翁一奏白雪曲翁亦為我歌紫芝  
此聲淡泊極有味往往世俗無人知山中之樂有如此  
嗟我捨此將焉之

新安鋪三首

罩罩澗中草泠泠山嶮泉泉甘而草芳旁有屋數椽夕  
陽漸近西風起行客山頭望千里

薄雲斜日亂山川投得荒亭晚息肩地僻誰知藏好景  
庭前花數折金錢

簾如秋水憇回廊素月分輝百倍涼山木交加無意緒  
故教踈影到人牀

晝息于林下

大暑涉長川前山後山深忽逢輪困木投得數畝陰僕  
夫六七人卧起且呻吟念爾亦太勞獨佚我何心試為  
蘇門嘯泠泠鸞鶴音遺聲滿坑谷爽氣回中林松風為  
之興涼冷破煩襟神骨斗醒快炎蒸豈能侵安得寫此  
懷寄之朱絲琴

途中大熱

促促客行遠悠悠山路長南歸當六月復值此驕陽祝  
融秉炎火清曉升扶桑流焰鍛地精兀兀馳澗岡籃輿



如入焙坐席似探湯晴瞳熨不醒背汗雨洋洋舌悶幾  
至死忍渴尚傍徨願借萬里雲蔚蔚排穹蒼護彼三足  
烏潛行天中央繼之以冷風浙浙吹衣裳豈獨一身輕  
與物共清涼

寄信州交代錢德循

得德循書知己植余所寄瑞香花二本于爽氣軒饒  
陽有木犀者亦天下之名花也試為我致二株足以  
相當因以詩寄德循

處君以西軒之爽氣贈君以仙府之名花名花芬敷隨  
曉日爽氣蕭颯凌朝霞山川從此增秀色塵埃不復留  
君家羨君年少氣力銳况有長才可經世馳聲京邑蓋  
有年作幕山州不得意漫尋幽景養天真積明不學陶  
潛醉錢夫子我今去指湘江邊洞庭波瀾濶如海與君  
似隔東南天饒州亦有木犀種真骨來從武夷洞自有  
清香百步聞煩君為買雙株送勿云千里移致難從古  
物輕人意重但將木李對瓊瑤餘物區區且安用

湓城東

廬山之岑岑橫絕東南天大江之湯湯洲渚相鈎連山  
水兩中間君家之故園憶昨別此去春風初破年歸來  
已秋節登覽恍依然萬里一轉蓬四時真蛻蟬退無環  
堵宮長逐車與船風景日愈佳塵埃日纏綿人事正浩  
蕩徒勞賦歸田

喜雨

暑伏忽已盡金風稍自秋驕陽仍不戢歲計實可憂昊

天雖甚高聰聰徹九州聞其憔悴聲知此黎民愁白日  
收赫赫慘雲布油油昨朝雨意足來自匡山頭稍添郭  
南坡次及城西疇入夜又滂沛四境界已周平明出東  
郭翠畝連山丘爽氣吹客襟餘聲壯溪流自此飽香杭  
可以繼麥麩聊為拊髀歌以代擊壤謳

白公草堂

達士因忘世非求高尚名林泉得佳處風物有餘清貝  
錦傷護舌浮雲寄宦情詩才今古備性理死生明蓮沼

秋芳合香山晚翠橫黃蘆繞官舍不復念青城

宿天池

我思廬山遊發興自年少偶來得閒侶更欲窺衆妙幽  
林穿蒙籠青峯上嶮峭遙看天池路一線在巖徼辛勤  
得至此慘寂已西照雲池挂無根瞪視心膽掉暮夜煙  
雲昏西巖亦登眺聖燈稍稍出弄影何窈窕一枝分百  
點變態不可料須臾歸寂滅何處觀朕兆僧房得栖宿  
爽氣冰毛竅翻然亦興盡却恨歸途寫緬懷道隆師確

不奉明詔似與山間石慙懃論久要我今來時迫心灰  
真可笑明朝指繡谷裏足登涼轎時足瘡未愈揩却壁上名  
恐為高人笑

卧龍潭

已登卧龍庵更看卧龍瀑來從不盡山奔入無底谷  
中鳴百雷林外漱寒玉雄豪與清泚上下相接續陽崖  
發幽花陰壑偃喬木兩崖天劃開萬古神潛伏我來坐  
潭上俯仰清耳目神骨倍瀟灑衣襟仍霖霖名山到能

幾好景看不足，慙慙莫思歸。更共潭邊宿。

二賢

羲之之墨池，淵明之醉石。人生嗜好亦天然，豈顧書淫與酒癖。一時聲價動宇宙，千古林泉記蹤跡。書固吾不能，酒亦久不喫。支筇葱翠畔，鑑影泓澄側。蕭然欣會間，頗類師也辟。所慕不靳能，舍此山南宅。

磁湖安流亭

怪石倚洪流，朱欄截荒磴。來窺空曠野，喜值波瀾定。涵

虛無邊裏見底皆淥淨磁湖萬家會華閣相輝映雙峯  
引西泐控帶浮郭盛乃知一聚落富庶亦有命鐵冶今  
久貧豪右蓋已病憶初締造人有力如卓鄭瑰材照密  
石歲久尚鮮瑩俛仰正忘歸白日動明鏡風順當進帆  
徘徊寄孤詠

寄題王道祖秀光亭

徙倚望西南秀色如可掬湘水感纖羅湘山疊明玉清  
輝來西隅朝爽浮萬屋圖寫卒難成登覽常不足會計



當而已庶吏當寡欲蕭然忘軒冕日可娛幽獨

西堂假山

范蠡不歸吳魯連東泛海當其縱目時長有青山在我  
今囚一官宅舍不容改塵囂日侵陵視聽乏爽塏天機  
能幾何與物相蘊醞當求景物淨以滌身心浼縣南山  
不遠溪口石可採疊累亦成形依稀聊自結寒餘洞泉  
脉綠帶天邊藹翠壁漸孱顏奇峯何嵒嵬喬林相隱映  
亭院生光彩笑揖浮丘翁霓旌如可待區區浹時力直

欲凌真宰稍全仁者樂未恤兒輩駭又動江南思匡廬  
田已買

寄題經父萱堂


萱堂有秋花對客如勸侑人生本多事更以百憂副  
惛橫天壤擾擾迷刻漏傾地救海涸揭柱支山仆徒將  
一心淑日與萬慮鬪不如偷餘閒來此玩孤秀熒熒千  
明缸照映相前後凝氣粲如笑泣露亂欲溜頽然寓遠  
懷可以消永晝吾兄儒林傑器業包宇宙崎嶇從遠宦

為國警邊候飛沙蔽城隍積雪冷襟袖頗思東南州水  
竹兩幽茂樓臺壓江濤窻戶排雲岫翹瞻不可見夢想  
勞頭脰樊籠送飛鴻檻井看騰狄暫憑時景佳寬此腰  
圍瘦吾儕所至樂未厭夷居陋賓侶時可邀從容醉方  
酌

尋真觀

武皇車駕東南出訪道求仙希萬一屏風九疊雲物清  
意恐神仙藏此室羽章之館締構新壇場夜夜析星辰

蓬萊縹緲不可到橋山一閉逾千春詠真之天在旁側  
白晝潭心飛霹靂田收歲美龍亦閒唯有濟淪照空碧  
誰道尋真是女郎朝飡松桂夜焚香明眸綠鬢今何在  
意已霞衣侍玉皇



清江三孔集卷四

欽定四庫全書

集部

清江三孔集卷六

詳校官中書臣張經田

助教臣常循覆勘

總校官知縣臣楊懋珩

校對官學正臣常循

謄錄監生臣陳秉寧

欽定四庫全書

清江三孔集卷五

宋 孔武仲 撰

古詩

松上老藤

在三聖寺

古木已昂藏長藤亦竒怪  
潛根蒼蘚中矯尾青雲外  
嚴秋霜剝悠悠夏景曬  
摧殘復長養鍛鍊成老大  
蛇蟠筋脈壯龍死軀殼  
在他時雷破山大雨洒滂沛  
茲松若

變化無乃遭結檜附枝物所患奪朱古為戒何不淬斧  
斤誅鉏此蕭艾

高臺歌

廢地積為冢昔曾遊宴來冢廢無子孫東家砌成臺臺  
雖平方冢雖秃物理廢興有往復相逢莫喜亦莫愁乘  
興且同臺上遊

種粟行

大兒肩鋤出茅屋小兒傾盤糝新粟春來雪稀雨不成



田雖翻犁苦未足嗚呼農人今向太平年安得甘雨一  
洒萬物皆醒然

賦張芸叟蕃刀

王師前年下靈州先生奉詔為參謀軍書堆案不足道  
欲斬名王懸髑髏官供器械如山積裝結雖巧體質浮  
傳聞蕃刀最可用買置不惜千金酌沙河洗滌血痕盡  
瑩若一水橫清秋長庚輝輝奪明月光景迸溢不可收  
軍回倉卒未及試提挈萬里來荒陬空齋倒掩閱圖史

深林永日號猩鼯揮鳴且欲驚暴客敢議與國平冤讐  
夜郎蒙恩放李白炎嶺得旨還幽求輕船共泊長沙岸  
幾日對語清湘樓紅蓮幕中邀客飲霧雨咫尺迷汀洲  
雜花落盡無處覓官妓遣歸不敢留清歡未免假外物  
共說鐵劍勝倡優君家所寶世稀有滿坐傳看驚殊尤  
護之太過却銹澁頑蘚鬱結纏蒼蚪橫磨十萬祇虛語  
得此已足馳燕幽今公又應元戎辟真能寸截鯨鯢不  
邠生入幕宜有畫定遠出塞將封侯我今喜得隨君去

長江渺渺平天流路危或恐逢水怪尾脊崔嵬當吾舟  
煩公一効飲飛勇為公椎鼓傾金甌

張秉叔出紫雲回鑿圖以示坐客因為賦之

開元太平無兵戎真人味道希夷中間之樂已饒足  
惟有青霄未追逐坐中誰似葉先生以氣為糧常辟穀  
朝登員嶠夕崑崙只與神遊不要人忽逢邀攜看月去  
縹緲虛空生紫雲蟾宮竟不容久住仙樂飄飄送回去  
歸來宮漏未移更甲帳明釭宛如故汾水悲歌仙不成

梨園空沒有遺聲紅塵如海漲朝市從此無人遊玉京

徐成之園亭三詠

瑞香檻子

異國攜來看愈新移當樽俎會嘉賓雖無絕艷驚流俗  
為有清香得近人燭下更宜觀態度酒闌尤覺醒精神  
湖南莫作淹留歎已見潯陽二月春

竹逕桃花

關地不盈畝點綴成阻修相招竹林逸更作桃源遊綽

約新飲露琅玕曾倚秋春風蕩人意此境獨清幽

石盤

攻玉為方盤可據以飲食又可安文枰兩仙相對奕簿  
書應接罷胥不留蹤跡散步到其間如臨蒼山壁下有  
清冷波灑灑欲侵席坐兼仁智樂豈獨煩襟釋長沙春  
正妍樽酒會嘉客好事清河翁題名刻之石

寄題徐亭

清晨讀君碑如到徐亭下靈境猶縹緲仙風已瀟灑亭

雖人為之洞是天開者化工不自了待子闢莽野徐君  
神骨不埃塵踈眉秀目方青春窮追屢束寇賊手幽討  
却作煙霞人當年遠祖嘗浮海採藥仙山竟何在君今  
復探山中竒潭潭六室世未知嗚呼安得此亭此洞在  
吾鄉廬岳自此增輝光

祠二廟之明日未得順風呈同行

岳州西祠從古有控帶洞庭湖之口前對隱顯明滅之  
相山下接淵淪洶湧之長川茫茫白沙連絕嶼淡淡古

木蟠蒼烟昭靈王左安流右翠帳朱幡擁前後鋸牙虎  
視森兩廂氣骨生寧欲奔走我來纜舟日已昏袍鞞跪  
聽祠官言伏興進退如法式四顧詭譎驚心魂平明結  
東舟將解叱吸仍聞北風大焚香奏酒殊無計伏渚藏  
汀姑有待二王威神世所傳鈴攝鬼怪賓靈仙好風相  
送勢不難舒卷造化須臾間波回草動似有意舉棹開  
帆卽千里吟詩賞月岳陽樓買魚沽酒巴陵市

廟下候風呈同行

楚水千百源洞庭為壯觀勢居七澤右地裂荆吳半而  
我泛扁舟飄然一歸鴈來之豈為益去亦未足算胡不  
吹清波縱發如飛翰朝辭廟山曲午泊巴陵岸況有三  
面風迎送俱無間定非偏薄厚以掇行旅訕奈何苦流  
滯兀兀晨復盱采芹朝當蔬伐竹暮供爨舟師三十人  
餓虎奔芻豢使之裹糧絕慮有探囊患二王東南望貌  
像頗輝煥歌鼓歲無休香燈夜侵旦我為江湖士乞靈  
從弱冠四到祠宮下霜髯今已燦王其故舊卹勿以塗



人看尊師况慈忍善道陰有贊王心或未回師頰固宜  
緩靈琰似見許歸來整檣幔

登君山二首

徑欲涉方壺滄溟何太遠試登君山杪直望蒼梧晚寂  
無纖塵動迥快千里眼勝境真少倫仙山連禁苑

楚水吞東南皤然天一腹君山枕波面半插蛾眉綠平  
空接遊氣香蕩無川陸歸槩恨匆匆殘陽挂喬木

武昌縣西山寺

孫權避暑宮也

吳王宮殿西山頭蕭蕭爽氣長如秋武昌連都甚偏仄  
賴有此山供勝遊東南豪傑俱故舊當年孝廉孫仲謀  
一朝名號僭九五朱紫羅列皆公侯驩娛應似河朔飲  
縹緲宜有雲端樓危絃脆管落天上飲散咸入西江流  
而今寂寞皆陳迹遍地松竹清陰浮巖泉滴瀝醒四座  
相見環珮鏘琳球龍泉寶氣亦消盡磨劍只有空池留  
老僧向我說遺事興廢反覆令人愁但當沈酣卷大白  
徐趨明月牽歸舟

同年兄袁思正江行相遇既別寓詩寄懷

楚水綠涵天羣山靄而秀君行當何之我謁慙已後輕  
舟翻然來喜氣瀉襟袖問知道途遠驚我形容瘦駸駸  
光景馳暮夜逐清晝嵩衡猶可禿鬚鬢豈長茂惟其寸  
心在皎日經宇宙持蓀可相慰不必傾醇酎君家多冠  
冕煜煜五公胄聲華滿天都名字在英毅登科况肩隨  
兩紀詞場舊誰云班荆樂却歎摻袂驟荆民日安堵漢  
政多寬宥飲酒祝無何千篇遲歸奏

留題攬秀亭

平生愛湓浦亦復思匡廬恨無謝公屐日與佳景踈茲  
巖特曠快一覽已有餘驟雨過軒檻清風來綺疏因懷  
騎鯨客更欲凌空虛

自寶巖入太一宮

蔚蔚山間松泠泠山下泉相遇復一時小別已三年松  
色愈深翠泉意自潺湲惟余不如昔正憂世事煎安得  
散萬慮卷收歸自然童顏替癯貌綠髮換圓顛因召杏

壇叟去拍洪崖肩

炭步港觀螢

九華之南蘆葦長流螢夕起不計雙爛如神仙珠玉闕  
青羅掩映千明釭空江沉沉未見月近浦穿林起還滅  
魚遊鳥宿自不驚我知此火初無情

彭澤縣

西江之水何悠悠下與江南為一州

闕

正以彭澤為襟喉千川百谷所合庾盡傾此澤如盃甌

鳴聲喑喑光油油不知其下有底不昔人有卷長繩投  
繫以南山之巨石百尺不徹深潭湫

關

頗疑潜行通十洲不然何此彈丸地吸彼尾閭曾不休  
城南十里山更稠如立象馬如驅牛下飲長江勢不竭無  
始以來向東流旋灣觸抵勁且道虎眼倒射驚沙鷗鼉  
鼉雖輕不能游而况往復之行舟下水從容勢猶可上  
水辛勤人更愁祠神皆以北風求不爾豈但須臾留天  
公頗知兀兀憂胡不推山作平地兩關旁野為通溝征

行萬里皆帖妥靈揚之威從可收陰官聞我言駭汗盈  
臂鞬洒為猛雨沃四野驚雷夜震波瀾灑我舌閣且凝  
久病竟不瘳強為短歌題柿葉欲憑雙鯉寄陽侯

泊趙屯

憶昨省覲趨濡川菜衣擁綠方少年艱難險阻俱未歷  
孟浪勇決唯爭先舟發趙屯猶未飯有風北起空濛間  
掀搖三山簸五岳巨浪倒潑東南天千林向人俱頓仆  
兩岸過眼真飛騫帆檣迴憂河漢底鷗首俯飲蛟龍淵

跳波濺沫來四面坐中時得鯉與鱸妻啼婢訕殊不顧  
兀坐正讀逍遙篇為言方破萬里浪不爾捉月為神仙  
江中逢巨石頗突為引牽逡巡水勢亦平緩幸免肝脛  
輸烏鳶暮投彭澤宿荒草神驚魄顫何能眠自茲稍悟  
垂堂戒靴紋纔起不敢前矜持太過僅無患徃徃所至  
傷流連乃知老謀與壯事心膽殊異難兼全重來此地  
畏洶湧藏舟別浦看漪漣魚跳鷗下自可喜何用蛟鱓  
飲流涎斜陽依依炤草木夾岸葭菼鋪書氈兒今弱冠



昔何有昔頷無鬚今皓然二十餘年纔瞬息時事幾蛻  
如秋蟬區區走俗亦何賴安得尺地巢林泉

雷亭四言

并序

慶厯中雷擊東流之巨石裂而為四五縣令某為亭  
於旁命曰雷亭元祐元年余登是亭作詩以識之

雷震於天石隕於山石則何罪龍殛石間容而不拒石  
則有愆毋謂恢廣不察神奸想方震時大雨溢川萬里  
晦冥風霆後先獨恨不及徙倚縱觀睨而不驚知神之

全余後過之間四十年乃記其始以永其傳

清溪詞

譙門之南溪水長斜暉倒閃青銅光下與長江作支股  
愁霖漲天江潦黃江潦黃入清溪清溪到底終無泥還  
如初出秀山時

瓜步阻風

昨日焚香謁聖母青衫鞠躬如負弩但乞天開萬里明  
掃去浮雲戢風雨謂宜言發即響報豈知神不聽我語

門前白浪如銀山江上狂風如怒虎船癡艣硬不能拔  
未免棲遲傍洲渚輕盈但愛白鷗飛顛頓可憐芳草舞  
三江五湖歷已盡勢合平夷反齟齬上水歌呼下水愁  
北船縈絆南船去寄言南船莫雄豪萬事低昂如桔槔  
我當賣劍買牲牢再掃靈宇陳肩尻黃金壺樽沃香醪  
神喜借以南風高揚帆拍手笑爾曹不知流落何江皋  
荒洲寂寥聽怒號

奉祠城西夜坐苑中即事

時祀白帝

喬林翳明星林缺星粲然長江闊咫尺銀河為通川爽  
氣浮襟裾中夜不成眠星轉轂而西河逶迤以遷惜此  
嘉景邁無由駐青天萬古留此境誰保金石堅徘徊吟  
華月更欲隨飛仙

賦碼碯笛

弟毅父所藏也

羌兒吹笛作龍吟中有太古之純音伊人已死笛仍在  
千古月明江水深誰知巧匠尋山谷感踏溪雲採明玉  
雲谷之闕

黯淺紫輕紅花映雨正聲隱顯初無端

造化推移指法間黃鍾妍美霜朝暖無射淒涼暑月寒  
輶車走遍天南北此笛此聲何處得韜之湘竹川錦囊  
廣坐聊持街賓客弘農學士九尺長頰顴山起鬢髯張  
從容奏罷陽春曲氣衰坦腹眠繩床由來雅器自有合  
不與教坊管絃雜君不見開元名臣宋侍中手揮羯鼓  
疾如風

癸酉冬雪

時致齋於禮部

平時看積雪吟對佳山川此地富華屋聽觀亦浩然愛

景匿何處凍雪迷遠天離離黃庭沙種作白玉田飛舞  
勢未已參差態逾妍坐來生精神起步輕欲仙京師百  
萬家幾室無炊煙南郭踵欲隨袁安正高眠且傾光祿  
酒逸氣隨觥船近害遠或利從古占豐年

送范中濟侍郎知慶州

平時廣朝中相見輒歡喜昂藏八尺身所負必竒偉四  
方獻善敗軍國盈虛計叩之如川流滾滾不知已天子  
曰汝能吾臣鮮其比而况所設施粲在

闕

汝可三軍帥擒之或縱之高枕惟爾恃公拜稽首  
歸眉目凜生氣頑童玩天恩豢養若驕子欲痛以鞭笞  
而畏啼不止二者不兩全在所以節制關

收其要害處進退隨所指重城徹關關沙漠  
淨如水辭別不躊躇安邊從此始

題瑞聖園

深沉百尺池坐見淵魚躍翁蔚千秋木中聞魚鳥樂久  
與魚鳥睽塵土厭徵索偶來叩異境佳思得開廓朝廷

尚清熙聖主守勤約鑿與不遊幸花卉任榮落便如到  
山林不悟近城郭心閒與境一足以慰寂寞由來市朝  
味未易勝林壑因循不遠引僉信吾儕弱

答毅父

朝趨朔風出暮乘殘月歸塵埃變髮毛豈不損裘衣憶  
昔年少日未知願輕肥登高作越吟所喜獨翠微至今  
清興在夢與南雲飛奈何寸景間擾擾隨鞍鞵已營三  
畝田臨流架柴扉惠而好我者儻許相因依種玉雖未



熟清泉猶禦饑

送林子中知成都

鞍馬覆山黑旌旗垂野紅問遠誰當行太守臨蜀中  
太守時之豪學博文章工人事未稱遂崎嶇已巴東公年  
方六十皎皎頭如童不服何首烏自有夜氣充丹田芙  
蕖開餘光發形容推此見治民亦與治身同以靜鎮浮  
躁以仁蘇疲瘵一夫無向隅四野常年豐間出作遨頭  
伐擊鼓與鐘遠民生愛敬有古循吏風豈止招學徒區

區繼文翁

夏夜坐遊李左藏園常父子駿明叔毅父元忠時

新除宣守不與朝參故斷章及之

王城雖多賢相過每希濶今夕復何夕共此青天月鄰  
園初剗築咫尺夷且潔胡床占勢便漫不就行列素華  
正冲融湛露已凝列羣至亦自喜點點欲螢滅衣襟稍  
淒涼何處有炎熱愛宜在山谷乃復近城闕高談追鴻  
冥不墮世羈紲趣駕公等歸晨雞有朝謁

江豚詩 四言

黑者江豚白者白豨狀異名殊同宅大水淵有羣魚掠  
以肥已是謂小害顧有可喜大川夷平縞素不起兩兩  
出沒矜其頰嘴若俛若仰若躍若跪舟人相語驚濶將  
作亟入灣浦踣檣布筏俄頃風至簸山搖岳浪如車輪  
氛霧相薄舟人燕安如在城郭先事而告昭哉爾功鯨  
啗牛馬頭象鼉龍暴殄天物安得爾同于人無害所欲  
易充暴露形體告人以忠又多膏油以助汝工江湖下

貧機杼以農烏鵲知風商羊識雨大厦之下風雨何苦  
豈知舟航方在積險以爾占天蓍蔡之驗古之報祭不  
遺微蟲孰揚爾烈登薦蜡宮世不爾好復惟爾惡我作  
此歌為昭其故

臨江鮑守示詩二篇因寄之

官居無時節簿領去復迴脅息文網中壯心安在哉積  
雪滿西峯中天白皚皚簾幄晝生寒復見詩筒來煩襟  
得洗淪耳目亡氛埃紀德無可陳詩情如七哀昔聞參

軍逸今見太守才況有循吏政養民如嬰孩窮山虎豹  
伏曠野桑麻開邂逅春色滿百卉東風催吾鄉足山水  
使宅佳池臺篇章日愈多無惜分瓊瑰

堤下

堤下人家喧笑語高揭青帘椎瓦鼓黃流滾滾經簷甍  
一任征夫作船苦綠榆覆水平如盃前灣旋放水頭來  
深如怒虎著船底玉石磊砢相喧虓黃河雖斷隋渠急  
舟楫舒遲行旋澀獨上平堤望遠天衣裘已畏西風入

寄襄邑宰丁陽叔

溪上一盃酒送君今幾時譬如霜林籜浩蕩從風吹初  
飄清相濱今落濁汙湄蹉跎雖漸老相見更容怡尚賴  
城市俗籃輿遠追隨鳴騶驚鴈鷺笑語在空陂會食古  
道場僧房靜簾帷敗荷覆一水落葉鳴軒墀偶坐亦無  
事幽來更何之旁有宋襄墓高墳映深祠爐烟已寂寞  
拱木相蔽虧意象宛如在興亡真可悲寥寥千餘年華  
采幾紛披有如蛙爭水頃刻成枯池池盡復為陸陸黍

秋離離追惟泓之戰語濶氣甚夷狗頭不急擗干將仍  
倒持欲將烏合衆慕彼鷹揚師首領幾不完身復為囚  
羈好大不量力荒哉徒爾為曾不如勾踐潛軍卷旌麾  
夜上姑蘇臺吳人猶不知用兵貴權謀高言竟何施從  
茲以名色留作永世規隧道彷彿在披榛猶可窺陳迹  
何足究吾儕寧好奇又上金山殿平瞰天一涯橫颺響  
羣鐸驚鳥投深枝清興乘未盡夕陽已紛馳流水復相  
促扁舟從此移怒號入旅枕先聲戒寒期相過不可得

况復窮遊嬉

猩猩毛筆與黃魯直同賦

染血以為衣稍親日月光封唇以佐酒衆饌登華堂誰  
令拔其毛萬里歸文房纖妍依象管寂寞伴螢囊生已  
多言語死猶近文章一身皆有用豈卹軀榦傷鼠須固  
微細兔毫亦尋常物以異為貴嗟哉俱自戕

汴河

滎渠斜與昆河接河遠渠慳幾可涉狂霖一漲高十尋



迅瀉東來比三峽崩騰下與淮泗會清泚亦容伊雒雜  
橫空九闕真垂虹怒捲千艘如敗葉祇堪平地看洶湧  
何事乘危理舟楫共夫鵝鶴行天上遙與谷中相應答  
但憂心手一乖迂巨舶高檣兩摧折而余進退久安命  
揭厲以望初不懾妻孥亦已慣江湖笑語猶如泛山陬  
鳴弓擊柝驚夜盜掘茹撈鰕佐晨饘時登絕逕步榆柳  
或面荒陂看鳧鴨我生東南趣向野揮弄清溪看苔雪  
枕流漱石真所便履濁凌險終未愜觚稜漸喜金闕近

釜甑何憂米鹽乏渾如海客泛枯槎繚繞明河望閭闔  
汴河汲井

解纜古城陰繫舟綠榆影浩蕩觀濁流咫尺有甘井譬  
如坐湯鑊傍觀冰玉冷望之首不回清泉逐修綆餘香  
入新稻真味添細茗蒸骨為之涼醉魄一以醒昔有少  
陵翁卜居在遐境美味當百金修筒接千嶺我今渾不  
費汲取在俄頃川路遠迢迢客愁長耿耿得此稍忘憂  
無殊卧箕穎

試院看月呈子駿明叔

禁城遙想催銀箭燈火相望人語斷門外流塵任自高  
中秋好月來相伴依樓委砌冰皎潔射隙侵櫺雪凌亂  
同僚二公迹見親相應頽影為三人吟咏清景臨佳樹  
骨爽襟寒不能去頗疑宵夢到蟾宮欲把秋毫分玉兔  
中山美酒生微波銀瓶快瀉金叵羅相邀一醉君如何

食蛤蜊呈子駿明叔

兩君霜夜兩相過有酒無肴爭奈何蛤蜊買得雖不多

百枚包以一枯荷呼奴再濯清泠波玉石磊落聲相磨  
乾薪闕燭稍駢羅暴殄天物真煩苛閉關拒敵難揮戈  
劃然雙闢如噓呵天然甘露貯玉窠不須易牙為調和  
爭先賈勇手自擎莫笑擎盤無翠娥釵明肉淨絕泥沙  
棄擲冗頑如投梭宮醅灑灑鸚鵡螺滿飲不惜朱顏酡  
念初搜索從海涯千斤祗載雙駱駝都城觀闕雲峩峩  
時新首到王公家吾儕得啖已蹉跎勢力不敵怨則那  
徃歲端居臨漕河此物堆積如山坡螿蟻淡菜暨車螯

其實氣味俱同科但嫌咀嚼費齒牙何嘗珍惜如京華  
物雖難得味乃佳一壺千金古所嗟三嗅而興君為歌

魚石二首

人疑魚託石我謂石為魚持以贈君子端能辟蠹書無  
情逐波浪有此璫與璵坐得江湖意蕭然亦起予

鬢鬣真可辨精研真人神得非造化境亦有雕鏤人頗  
疑著妄想歲久積成真茲理不足怪方屏藏月輪

遣百朋赴太學補試

冉冉浪相逐江湖今十年念使從遠學家貧乏鞍韉一  
官來京都環堵當西阡學省咫尺近彷彿聞誦弦暫當  
辭家庭裘馬去翩翩英豪多出此切琢期勉旃昔我遠  
方來算里近五千清燈耿殘月積雪堆窮年對經必歛  
衽求師欣執鞭絢藻頗不乏屢貢多士先所願克堂構  
使我安食眠爾祖最爾愛置膝自撫憐追恨不及見泪  
下如湧泉

李公擇山房

石磴不容步喬林森迴還聞昔有威鳳養羽留此山乘  
此去翱翔得意今不還餘音落何處尚在雲泉間陳迹  
雖可尋飛轍誰能攀

萊師迎娶還吳省親遂之家達州以詩見意

言止蘇臺駕遂泛荆江舟京師訣別易不以樽俎留念  
書片言贈俚音謝珠球飛飛雙鳳凰指日還故丘更翔  
西南天江雲慘高秋尊公今季鷹菰蓴契良謀恩威在  
兩部所至膏澤流弟當繼華門不愧古箕裘高風長堤

柳挂帆已雄牛相望以功業毋為置書郵

送趙正夫使江東

酌我一樽酒送君千里行青天連上黨秋鴈回汾并戍  
往喻上意還歸對承明無為厭朝集寂寞戀邊城

送畢公叔使河北

東觀久寂寥君王念多士鸞鳳望青雲聯翩羽翰起英  
英畢公叔聲價動天子劇談時利害如瀉九江水駢駟  
厭羈縻放步即千里間關北門道牽車從此始蓬瀛墨



寶爛原隰皇華美英氣掃豺狼清風回獄市雖牽倚門  
念猶勝捧檄喜書止慰索居時付黃河鯉

書館買粟飯取閤門水以接晝饑

食粟淡有味飲泉甘且清粟白來天市泉美汲官城斜  
暉轉西牕饑腸蚯蚓鳴暫時簞瓢趣無計邱壑情華堂  
發八珍甘鮮雜鹹腥挾取既不專棄餘飼蒼蠅何如簡  
且易月夜泛瑤瓊快汲不留咽殊勝豆與粳井冽有真  
甘復不糝藜羹

遊善題寺二首

李長者畫像

磔礪一居士娉婷雙少年對景如無有著書方浩然分  
身聊示頸誰悟此因緣

殿西

步屣出廣殿花木何陰陰鳥聲來迎客幽趣是山林當  
年曾如此遍入匡廬深

五月望參

起夜詠庭燎晨裝候當門雙飛劃天起萬馬散雲屯王  
喬背城郭飛鸞從遠村入綴外朝列每瞻天帝尊時值  
甘雨足大官復牢飡殿開宸極正日映玉顏溫抃舞効  
百獸飛翔侶羣鴛復轉千步廊崢嶸望西昆朋簪談笑  
餘經史多討論

謁蘇子瞻因寄

華嚴長者貌古竒紫瞳奕奕雙眉垂顏如桃花兩侍兒  
問其姓名自不知躡嚅欲吐新竒詞豈亦有虎來護持

維摩高卧盡不應蓬山藏史策馬馳三豪兀坐渾如痴  
錯認醍醐是酒卮誰將此景付畫師

五月廿八日雨後

黃昏雨一雨稍覺襟袖涼中宵如河決浩渺不可當浮  
雲合四溟無復窺神光門巷失舊徑北鄰有頽墻恐地  
俱蟄龍難安三尺床闍人亟來告客土壤溝防坐此不  
踈達漸漬室與堂我迷忽復悟豈暇立徬徨荷鍤哀衆  
力畚土逾百筐坎窞快不隔飛流復湯湯中庭燥如舊

漠漠蘭芷香迺知天下事壅塞成疽瘡決水復不難吾  
有扁鵲方

籍田觀荷花

綠水滿平郊江蓮輝幽渚偷香一霎風逞響無邊雨波  
間的樂笑竹裏嬋娟舞異境看仙姿蕭然失煩暑

送蘇邁尉酸棗

酷暑日逾退涼風生早秋翩翩蘇公子一官不遠遊仕  
養兩得意人生復何求駿馬如飛星錦帶垂吳鉤到邑

嚳訟少官閑吏兵休還當有佳吟吟到黃河頭

閣下觀竹筍圖

我家廬山下綠竹常陰陰春雷迸狂籜萬點羣玉簪別  
來經歲時肌肉塵土侵歛見此圖面醒然豁煩襟方幅  
藏萬里環以青山岑旁飛清泠泉下有瀟洒林恍惚如  
夢到杖筇聽幽禽欲投環堵室浩渺忽難尋人生諒自  
苦一官冰蹄涔搖尾爭光華豈知滄海深虞卿銜白璧  
季子夸黃金貪得以忘我俱非賢達心何如返鄉國坡

塢窮差參茅簷當天風時聽笙簧音

伏中作

酷暑已旬日薰炙勢自如昨夜得佳雨新涼生太虛清  
風入牕牖蚊蚋避衾幙木末有勁氣淅淅如秋初稍見  
清泠池幽香隨芙蕖三伏已過兩禦熱沛有餘更得滂  
沱澤大患自此除中園有佳果甕面有浮蛆相過玩華  
月北隣寧我疎

其二

去歲復今日清槐繫扁舟手攜筇竹杖朝上龜山頭百  
川合為一浩渺蟠天流徙倚弄佳音嘯歌懷舊邱京都  
偶為客歲月復臨秋蓬轉近千里星回將一周酷暑雖  
暫解餘威難速收金火兩相搏火壯金欲流恐有鬱蒸  
陳當代作戈矛且當事紈扇未可窺狐裘

閣下觀峴山圖

峴山巉巉清溪濱倒影萬丈之奩淪徃歲嘗有去思吏  
熱地尤多高蹈人少年仕宦頗落魄時登絕頂攀蒼冥



幽花美草頗娛目  
斷碑刊碣還傷神  
曉猿夜鶴輕相別  
從此奔走十八春  
舊遊不復齒頰挂  
方知到骨俱埃塵  
麟臺昨日見圖畫  
醒若楚客還羈魂  
方嫌一幅論萬里  
秋江綠水何粼粼  
人心與物本無別  
正為利欲相埋湮  
神功妙手如喚覺  
滿座風月來相親  
騎驢徑去自可到  
猶愈飄飄西遊秦  
剡沽宜城醉其下  
日夕倒載望冠巾

食冰

冬冰冽冽雖可畏  
夏冰皎皎人共喜  
休論中使押金槃

荷葉裏來深宮裏  
曾煩肺涸聊一蘇  
任爾青蠅相趁死  
經時不壞已可憐  
濟物之功尚如此  
人言霜雪比小人  
我謂堅冰似君子

愧魚亭

昔聞魚可羨  
今見魚可愧  
邂逅臨池處  
瀟洒出塵意  
秋風八月起  
江湖水染紺  
碧霞綺疎悠然  
掉尾波間去  
須信人生不及魚

劉器之陰山七騎圖

北風颯颯邊雲黃飛沙曠日天慘蒼駕鵝鳴哀鴈不翔  
七騎正出陰山傍山傍陰塵歲無陽鳥飛墮翼人立僵  
犯寒跨鞍知悍強以此決戰誰能當面顏雖在姓莫詳  
一一大帽新衣裳馬蹄澀縮弓不張但見旗旆隨飛揚  
鳳瓶倒酒進其王俯仰意氣驕雪霜橫斜道路深淺岡  
想見射獲多麇麋時平不復憂邊疆但見樓蘭馳驪驪  
仍啜苦淡無輝光人生所樂惟故鄉彭城妙本家世藏  
託以輕縑盛錦囊持來舒捲臨華堂環視歎詫幾發狂

我生未省到朔方坐令出塞意慨慷歸可敵千金裝  
長厚不疑同舍郎

落葉

落葉不到地隨風復飄揚凋殘北牕陰凌亂日西光時  
節如未已烏烏情亦傷何事千丈松歲晚仍蒼蒼

入局馬上

愁雲慘慘增寒威冰鋸砭骨裘不支鳴騶南北困道路  
擾擾人趨入省時京師久旱塵土惡喜有小雨沾鬚眉

跨鞍便起江湖興  
波明別浦柳半垂  
卧聽篷聲睡正穩  
放船不問歸來遲

芻車吟

京師患無馬有馬患乏芻  
長鞭隨牛牛引車  
三冬以來要貯積  
十倍之價在須臾  
都城之物不便美  
枯笋宿菜供庖厨  
况此判秣豈能足  
雜以豌豆調陳麩  
却思當年在江湖  
綠陰冉冉如雲敷  
百馬嘶齧皆自如  
安知入市比金玉  
風物陡逐山川殊  
馬飢且瘠不足怪  
壯士猶有

釜生魚

踏水入省

匹馬泛冰澤海濶難經過玉浪來溟溟雲濤起  
戔戔投瀧若投岸避凍如避渦蹄脆復參差覆舟在中河碎身  
須臾間不殊葬龜鼉飄蓬白日東涉險奈遠何屯雲猶  
滄溟何時縱陽和畏途正渺渺浩然商聲歌

子瞻畫枯木

寒雲行空亂春華西風凜凜空吹沙夫子抱膝若喪魄

誰知巧思中萌芽敗毫淡墨任揮染蒼莽菌蠢移龍蛇  
畧增點綴已成就止見枯木成槎枒更無丹青相掩翳  
惟有口鼻隨穿呀往年江湖飽觀畫或在山隈溪水涯  
腹中空洞夜藏魅巔頂突兀春無花徑深最宜繫畫舸  
日落時復停歸鴉蘇公早與俗子偶避世欲種東陵瓜  
窺觀盡得物外趣移向紙上無毫差醉中遺落不秘惜  
徃徃流傳藏人家趙昌丹青最細膩直與春色爭豪華  
公今好尚何太癖曾載木車出岷巴輕肥欲與世為戒

未許木葉勝枯槎萬物流形若泣露百歲俄驚眼如車  
樹猶如此不長久人以何者堪矜誇悠悠坐見死生境  
但隨天機無損加却笑金城對宮柳泣然流涕空咨嗟

送王炳之之饒州

衡門喜見過相與話行色江左昔之官鄱陽飽從役重  
湖繞官舍塵不到旌戟綠水平朱欄青山臨畫鷁魚來  
城市富鴈下沙汀黑玉楮光動毫瓊盃香泛席固知足  
優游但恐少賓客聚散寧易忘登臨儻相憶



送毅父弟使江東

人生何能為寄迹夢寐中之子又遠去扁舟逐江風而  
我獨栖栖弱羽挂樊籠袖手欲大呼窘如猿檻窮逼迫  
褐與被況以憂患攻坐令形勢隔出處焉得同又無凌  
雲期翩翩作歸鴻強埽道南舍竹陰泛簾籠及此光景  
長無惜舫船空明發看解纜渠波劇奔驄

初秋大熱

金神整霜仗昨日從西回謂當有爽氣吹蕩滄溟開誰

知祝融軍執熱趁趨來六龍駐長安無風動浮埃  
鑪筠氣烜絕庭鶴羽摧頽向晚蚊聲號轟轟漸成雷  
徑思去塵囂登臨千丈臺披襟迎清颺俯聽驚鴻哀  
僕羸不能駕我馬亦虺隤閉關吟愁雲履迹亂蒼苔  
炎涼自交戰我輩能忘懷

清江三孔集卷五

欽定四庫全書

清江三孔集卷六

宋 孔武仲 撰

古詩

錢穆仲有高麗松扇館中多得者以詩求之

巨鰲昂頭鯨掉尾東顧滄溟百家作溟茫天接水錢公涉險

如通渠破帆一作扁舟一抹三千里島夷之國遠且偏歸來

逢人語輒喜大荒茫茫最宜松直從曠野連深宮聽聲

卧影已不俗况作團扇搖清風

一云國人裁治多織巧故有團扇饒清風人

情重遠由來事不貴黃金貴楛矢况有新詩傳四方羣

豪追隨弄薦章我雖相見無所得坐憶松鶴生微涼

往年

在廬山見僧房有高麗松扇歛之不盈寸舒之則雪山松鶴意趣甚遠

錢公治迹壓張趙

偷兒破胆皆摧藏桴鼓不鳴已三月凜凜霜威破殘熱

從公覓扇更覓詩願報瓊瑤

一作玖

無已時

內閣錢公寵惠高麗扇以梅州大紙報之仍賦詩

昨夜秋風來戶庭殘燈閃滅微涼生得公團扇未及用

挂向空堂神骨清，但將遠趣醒耳目。不獨暑月排歎蒸，  
慚當厚意無以報。前詩空說玖，與瓊漆箱猶有南中紙。  
濶似碁枰淨如水，傳聞造之自梅州。蠻奴赤脚踏溪流，  
銀波滲徹雲蟾髓。入軸萬杆光欲浮，收藏終恐非吾物。  
寶劍銀鈎有時失，不如包卷歸文房。錢公家世能文章，  
五日京兆聊爾耳。歸步金鑿上玉堂，玉堂不復知吏事。  
紫橐華簪一作荷囊奉天子，鳳閣曾觀思湧泉。謫仙今振辭  
如綺，不似冷官太苦辛。吟哦風月愁山鬼。

秋夜對月

月行青天入重雲金波洩洩穿魚鱗須臾雲收境亦靜  
虛空表裏無纖塵寒光正與人相射碧琉璃中低玉盆  
微風更入北牕竹餘聲颯洒清心魂頗疑碧落在步履  
廣寒清都相與鄰乘槎去後事寂寞至今織室臨河津  
却思白日走城郭浮埃馬足何紛紛勞之以晝逸以夜  
天意儻欲甘苦均人生南北無定所浪自轉徙隨燕秦  
關河渺邈鄉井異惟有明月來相親崎嶇萬里如咫尺

圓缺惟有年年新如茲久要乃可喜相對可不羅壺樽  
黃金如不付酒媪雖富不如長賤貧重城泐泐稷下

原缺

松蘿永愧山中人

觀鍾離中散草書帖

兒童不識草書法但見滿紙鱗蛇結安知筆法追古初  
睨視衆體稱雄傑事忙往往無暇寫屬思幽牕乃奇絕  
鍾離昂昂散人後寄迹一官今白首潛心妙趣百事忘  
興來書空不停手當年飄泊重湖外翰墨已有時流愛

風波頓挫格逾邁羽翩翩入吾輩一時已聞紙價高  
千古定有書名在何當灑掃竹洞邊雲醅滿酌黃金船  
萬事崢嶸置毫末三盃縱逸如張顛相知本不誇勢力  
休論脫帽王公前

憶九江呈李端叔

家園大江東清溢映匡廬波光搖空濶嵐翠隨捲舒廓  
然形影消所見惟清虛此是列仙宅當年來不居一官  
老南北十年棄樵漁諒無飛昇骨宜與煙霞疎子亦喜



登臨持氣為舟車乘馬蹇虹蜺俯澗窺蟾蜍賦詩不計  
篇飲酒動斗餘一為簪纓縛屢感歲月除西征臨潮海  
東使騎鯨魚歸來顏已蒼相見兩勤渠話及少年事慨  
然咏歸與富貴非所期朝衣裹猿狙鼎食多憂煎未若  
羹園蔬何當永卜鄰之子同耕耨清風卧醉石落日登  
籃輿道逢酒家旆聊復為躊躇白首入石城君心竟何  
如不然因便道鳴騶時訪余

五鼓

夜枕回遠夢北牕覺微明遙知扶桑曲萬頃搖光晶江  
海已澆滄魚龍俱震驚大哉陽德敏頃刻周四溟天星  
黯餘照林颺颯先聲栖鳥不安巢世務新營營陽德固  
主動與物皆流行君子法天時燕居嘗夙興流火感隙  
駒翰音伺雞鳴焚香奉真祠篝衣尋六經夜氣猶未曉  
神觀則愈清力省域倍奧心虛思彌精道要處戒定自  
伐如刀兵書紳以自勸因之遺友生

戊辰雪

初臘氣亦佳窮冬雪還虐晚風浙瀝響暮勢聯翩作餘  
寒逼觥筯遠景明池閣想像山陰人扁舟在寥廓

又

歲日雪亦好今日差可憂盈尺望已足太多民始愁穀  
價起如涌城郭饑者稠後期無乃遲春郊多麥麩

館中竹影

綠竹帶斜暉猗猗有餘態微風到簾櫳舞影入圖繪更  
無餘聲雜直與妙意會掩卷罷吟哦誰同此三昧

早起趁朝

山房客夢驚槐廳雨清絕蕙爐香寂寞半挂北牕月重  
城車馬動起坐候明發華蓋望宸居煙飛隔雙闕

閣下會食贈張文潛

錦帶貂裘亦不惡宿酒移春入顏角人憐枳棘棲鳳凰  
誰許青山入雲閣為我坐誦離騷篇森羅屈宋俱眼前  
却歸北齋枕書眠夢乘紫雲飛上天覺來斜日催野鞭  
隨車擲果長安市不信潘郎風骨仙

館宿

啾啾簷間雀側翅相悲鳴歲晏寒雖壯雲稀雪未成  
同舍布路歸禁局斷人行敗箕推殘葉偃僂一老兵念非  
太瀟洒安得耳目清爐燭久更高宵鼓動嚴城

送吳叔揚通判代州

雁門襟喉地北瞰單于城漢騎罷深入塞垣春草生題  
輿當遠去磴道歷崢嶸載路壺漿饋出郭幡旗迎公堂  
足奉養美酌與犀兵漏刻閒愈永衣裘寒更輕五臺聚

仙聖事迹衆所欽片時缺冥邈萬缺登幽情政成早歸  
來銀章對承明未遂遊邊志羨君為此行

和黃魯直送茶二首

喜君屢致雲溪茗值我正校琅函書飲罷清風生肘腋  
吟成碧海登明珠誰能墻間享膏腴只意林泉身自如  
他年遠別歸賀監乞取茶山比鏡湖

又

君茶勇勇睡魔闢但恐濕我腹中書欲釀黃金臺上意

愧乏夜光明月珠

原缺

如

多君藻思比華腴新詩妙墨更如湖

送邵彥瞻通判濠州

民情極簡易關決未應勞佳句寧我知為君屈揮毫

送徐成之通判永寧軍

少年意氣橫寰廓淬拭龍泉出鋒鏑人情俱欲向長安  
天語新令倅河朔霜風冽冽吹邊州青驄駿馬錦貂裘  
也知未足稱才用猶勝當年為薄遊缺古白髮今憔悴

別來慙懃儻相記塞雁高飛不可馮寄聲亦有南歸使  
晁無咎張文潛同校名臣事迹因贈

畫省深沉天上居道貌日與塵客踈天公恐我太寂寞  
更遣兩仙同校書名臣已去騎箕尾尚有規模在新史  
浩然初若泛滄溟目眩形勞安得止興亡治亂畧可知  
兩公少壯方施為齋房比鄰數相說聽公清談

缺

高樓行

天悠悠雲幕幕半夜微聞奏笙笛爛彩燄飛仙鷓鴣戢



其翼高樓百尋當大途東臨紫垣望青都中山黃封傾  
百壺五陵豪少來歡娛夷門帝家盛遊樂奔走環觀溢城  
郭如今官吏橫索錢縱飲誰愁家寂寞

丁卯春雪呈同僚

經時無甘澤帝為元元憂新正得一雪尚可期有秋狂  
風東北來浩浩舉山丘飛霰為先驅繁英已綢繆堆深  
地欲蟄舞急川爭流沉沉西崦暮落勢漫不收盡移白  
玉京來為帝王州癘鬼窟相泣淒涼苦罷休旱魃亦失

金史四庫全書 卷六  
氣耿耿空自囚從茲民其康終歲飽麥麩端門盛佳氣  
策府多英遊諒多贊時瑞豈獨吟空愁金樽發清揚思  
湧如雲浮請歌豐年占以代擊壤謳

大風入朝

風從何落來何處百馬盤空正號怒閉戶猶恐丘山頽  
誰人放舟江海去廬山之南白雲翁冠帶強遊京邑中  
狐裘包纏不煖體却羨爰居能避風

送晁無咎之官塞上

人生苦南北相見出偶爾喧闐都市中乃復過之子東  
萊遽別後故人今有幾洗洗塾與序進學亦可喜語闌  
行色動輕裘有知己去去何當回山川正芳暉邊州剩  
厨傳應不典春衣

蠟梅二絕黃魯直云王都尉有之邀同賦

蠟梅直何如但聞鄭家說淡日明晨霜涼酥點春雪

又

清嫌冰麝俗淡學池鵝黃情知不是蠟風定有餘香

道傍樹

蟠根官道傍生飽禁城霜春風功力微礫石百尺長肌  
膚凝金鐵大一作雪凍不僵度歲亦辛苦成材必堅強  
他時擎大厦白蟻胡能傷

遊城北李氏園池

池塘春色歸波水已極目鳧雁稍下來垂楊舞新綠登  
臨不憚遠枉徑入重復已見數種花參差隔脩竹非特  
野興長彩翠動華屋沁園天下名魯館當年築百年猶

盛麗風景冠輦轂當時手種植仰視皆喬木主人况仁  
賢客至初不速躋攀脚力盡更酌以醕淥左右列圖書  
南北置殽簌夕陽整歸驂尚謂夜可卜明日憶勝游長  
歌寄金谷

瓊花畫軸

我欲遊廣陵江湖浩難涉喜有瓊花枝相隨在中篋北  
人初不識謂是玉蝴蝶天妃絕世艷乃以方妓妾古祠  
惟一株他種不欲接春風亂百草紅紫鬪紛煜皓然姑

射姿豈少朱粉頰鐵幹已崢嶸雲朶正稠疊書林日清  
閒萬慮坐收攝悠然對妙筆頗與幽興愜彷彿未易得  
吟思舌徒囁

京塵

蜚塵冥冥逐馬尻麟麟牛車何太勞春霜十日似妥帖  
稍晴仍復起波濤非徒漸漬襟領黑復且侵凌宮殿高  
吁嗟性地本安靜何乃紛擾爭雄豪祇憂飛盡到坤軸  
萬怪菌蠢難藏韜願回河淮作溝瀆貫穿城郭還周遭

分衢洒掃萬丁力常遣瑩定無秋毫身微願大恐難副  
有如畫釣塞鯨鰲彈冠振衣但隨俗寄身此境何由逃

賦得九華松管筆

松枝為管京邑無山翁持贈最勤渠千年自飽幽澗雪  
一日忽快南牕書但知來處已瀟洒况復毫端精有餘  
茅齋舉眼有真率象齒琅玕渾不如

移花

春光不徘徊忽過如插羽忽忽陌上兒移花急風雨山波

爛額繡平日誰指數到此俱可憐輕妍若時女我家王  
城西披風立環堵坐思清興添不可佳時負晨朝市桃  
李百錢得三五

闕

若不暇

闕

晤語

闕

夜對青藜芳草玄

晁無咎大硯

玄玉琢為池潭潭可容尺圓侵震澤璞潤帶端溪色麟  
臺雙書御史孫揮毫應敵妙語言滔滔百丈洪河翻助



寶以泓還駿奔君王側席明光殿直言儻有公卿薦區  
區邊計不須陳亦論皇王繼家傳

答蘇子由留贈

西垣有古人磔磔氣貌古落筆成文章無可加損處策  
蹇得過門殷勤相勞苦湛然神觀全秀粹充眉宇語我  
春已闌斯民望時雨宿麥正滿野驕暘惡如虎雲師未  
灑澤赤子將誰乳侍臣當憂國密計應裨補又云好著書  
安得一州去知公趣操異不為夸腰組衣錦若還鄉亦

當從幕府

再用韻和子瞻

堂堂司寇公族姓原自古支流入漢唐浩渺無尋處子  
瞻得家法自少不勤苦戲劇入場屋名聲振寰宇凝思  
膚寸雲落筆萬點雨中間觸機阱窘若帶箭虎坎軻連  
交游凍饑及穉乳歸來直玉堂得失亦相補願我靡一  
官未即江海去裳衣裹窮猿繫以三尺組知公心胸中  
坦不置城府漫刺猶可持還當謁文舉

休日與李端叔出城西

荷葉欲漠漠柳絮已飛飛東風如車輪日夜挽春暉天  
郊多名園曷不事鞍韉休日不暇沐權門亞冠衣嘉與  
之子游浩歌夕忘歸

次韻蘇翰林西山詩

詩中兼述鄧聖求家樽事

黃州水米宜新醕東坡好花公自栽折花倒酒送流景  
不念春風飄落梅醉投青山上九曲吳王故宮壓崔嵬  
寒潭已無昔光景涼殿歛燮今樓臺南陽翰林當此日

力探竒險祛塵埃西江雪浪接溪國巨石森起繁如堆  
手披荒榛得突兀中有宏處成樽壘漫疑蹤跡塵埃暗  
從此出躍樊山隈大賢坎軻終必用古劍雙螯生莓苔  
忽拋光芒萬丈去星斗辟易青天開攪槍枉矢莫妄動  
以湯滴雪誰先推披竒振淹自明主區區識寶非張雷  
陽春一奏衆爭和咸韶蕩默羣仙來雖然此亦外物爾  
豈繫兩公樂與哀

春晚作

年華工密移回首已春暮雨掠天桃空風折牡丹去芍  
藥殿花陣披靡不能住惟有醪釀開仙葩照行路清香  
飄夜月淡態挹晨露得酒便孤斟遠架耽徐步我如車  
上人醉逐四時鶯浩蕩無所之誰能問徒御

三舍人題名於後省皆賦詩因寄呈劉貢父

西垣寂寞今已久三賢文章鳳池手朝來不復戀山中  
後至儻誰居客右華堂刻石映今古秀句連章動星斗  
鴿原棣萼俱相望龍吟虎嘯生輝光就中貢父缺故鄉

况有小阮爭翱翔翩翩亦試中書堂

曾子開示詩再用前韻

川滔海積歲月久書禿十毫未停手昔人四十夸專城  
公佩黃金來帝右當年逸足起江西時輩共喜星之斗  
榮華未滿衆所望天啟叔季侍清光莫言晝錦歸故鄉  
莫對秋鴈思南翔且登金門上玉堂

蘇子由示詩再用前韻

公家兩賢涉世久六馬從容轡在手驅馳有節心有常

進退不隨人左右十年挫抑心不回方知有膽大如斗  
鸞坡鳳閣蔚相望燦燦奎壁連晶光我家辛勤出寒鄉  
斥鷃未易追翱翔莫將滄溟比坳堂

慧林遇蒲傳正呂子進間談

粲粲西臺彥恂恂華省郎相過金城靜縱語春晝長逍  
遙喜莊生做誕尤稽康紈扇不須搖牕間襟袖涼

平陽歎

壞雲如山壓齊壘六軍顏色如灰死高郎元自解琵琶

萬歲無愁作天子伯升何曾上青天  
濺血遺痕芳草間  
長城萬里自推仆駿馬只馱馮小憐  
姦臣百計為姦賊  
不但妖娥解傾國熊羆哮鬪感平陽  
馮妃對鏡嬌櫛粧  
死生契濶不相棄雙雙刎頸長安市

次韵和文潜休日不出

清風入北牕幽曠諧我心之子亦宴坐  
焚香齋閣深  
平時仙道家蓬蒿倚瑤林願言枉相過  
小駟馳駸駸



文潛真可人壯歲有老心塵境暫來寄天機元自深鸞  
鳳翥赤靈亦有鶴在林冲天期一飛載驟謝駸駸

尉氏道中

江縣花已繁天畿草初茁春風動地來萬鼓相應發長  
郊不敢進環坐借藁秸前村應稍近時有駝鳴圖

歸舍吟

長堤夾天溝浩蕩東南流上有騎馬客枯髯清兩眸馬  
後無飛蓋馬前無鳴騶進無趨退無輕俠遊攜金

入市賣十鋪不一售包裹却歸舍置之牀一頭半夜光  
滿屋潛知是精鏐貴物莫賤貨不如深巷收一旦遇知  
者堆斗價可求寄謝路傍子神珠難闇投

秘閣觀唐法帖呈同舍諸公

雍熙真人金丹成騎龍逍遙上太清一時文物甚炳煥  
至今高閣留崢嶸道山不為人間設千秋長鎮白玉京  
蓬萊諸仙當閒暇相邀初作升天行宮殿相望金碧動  
觚稜半引霄漢明鏘金寶鑰端門闢四坐光芒炫奎壁

換鵝何處得遺踪  
臨水當年應盡墨  
波瀾入唐仍浩瀚  
追躡餘塵猶十百  
味入墩蔗真漸佳  
力未半途多自畫  
萬物莫如觀所聚  
我生強半初相識  
相期更乘飛雲來  
琪花為盤霞為盃  
噉味沉瀼臨丹臺  
興盡翩然欲歸去  
從此心骨無塵埃

渡江

扁舟臨朝陽  
匹馬渡江北  
志士豈懷居  
征夫樂行役  
東風吹高原  
生意密如織  
早晚卸塵鞍  
皇州正春色

家居三首

毀譽平千載窮通譬一毛  
虹蜺千丈氣豈便伏蓬蒿

又

曉色奪燈焰秋寒侵薄帷  
漏衝吟思斷風從魂夢歸  
萬慮不嬰抱一心初息機  
都忘塵土上裘馬鬪輕肥

又

邑居不見江山景去馬來車喧  
萬井冷落重簾日影西  
蕭條四壁人初靜輕颺卷空雲  
幕幕水影天光同一色

滿樽濁酒愁不醒  
悵憶松江萬里行

偶書

暮上高樓聽村笛  
清風寥寥吹澤國  
蒼山莽野百戰地  
美木陰林四時色  
浩蕩坤乾萬里中  
風光盡屬漁樵客

江上

秋空杳杳豁四顧  
葛衣藜杖尋堤去  
雙鳧拍波天外來  
一棹凌風鏡中渡  
靜中榮辱興蕭條  
指點蓬萊作歸路

龜石

平川洶洶經南國足練橫拖半天碧洪瀾巨浪之中央  
忽見頽嵬太古石此石由來幾許時混元一氣初開闢  
神功割破混沌胎劃落半空隨霹靂非龜非鼈不可辨  
有若神龜見蹤跡精剛不待媧皇鍊渾樸寧從巨靈擘  
我知神物本天性推移運轉非人力當時大禹走天下  
驅至九江為納錫萬牛攢車載不動鐵軸崢嶸自堆積  
秦皇鞭山移四海怒視不能移咫尺至今獨立猶驚人  
地志山經不能測千靈萬狀誰復知一片堅頑粗可識

昂頭突出翠濤中  
跪足橫踏九泉脈  
勁殼縱橫竇穴穿  
當心一搭莓苔黑  
淵潛不見曳尾狀  
日爍猶驚負圖色  
青髯剝落向何處  
秋草綏綏晨露滴  
勁健曾支玉女牀  
爛斑似點垂龍額  
漁翁未網先自駭  
靈著欲伏安可得  
龜鼉縮首不敢近  
蝦蟇巡行夜戰惕  
歲冬大寒百聖伏  
圍勁缺勢無敵  
側風磨霜鍊無日  
休髮鬢皺痕成兆  
拆負才不免剗腸  
累至珍惟藉天公  
惜灼以炎皇之火  
精釁以少昊之金  
液神鑽鬼卜不見  
形陰陽造化無遺  
策

大哉龜者物之精歲久已化為真形有時月黑無人夜  
繞岸光芒芒自生下駭深潭恠蜃窟上應中天玄武星  
萬衆森森下相向來決吉凶真偽情奸狐妖鼠已破胆  
山魃野魅見亦驚波神吞氣不敢喘四面長漪鋪席平  
吾聞溪老記往歲半夜風雨來冥冥剗然曳轉大潭左  
百里震驚如雷霆缺憎挫折雖萬狀崔嵬孤高終自靈  
吁哉天地至奇物何為流落于江城銅馬猶聞標漢殿  
神羊昔亦馴堯廷便當推置玉堂上古貌岌岌無敬傾



姦臣猾豎作狐媚見之頰面先吞聲凶荒水旱必可卜  
倉卒變恠皆先明匈奴喪魄萬里外慙縮不敢窺天兵  
龜乎龜乎用不用壯士與爾同死生

鴈翅夾作

川險固可畏順風胡不行維舟鴈翅浦安此水一泓宗  
慙萬里意謝安江海情子何獨惴惴不慕天地鵬傳聞  
此洲外飛廉正豪橫萬馬拖縞練千山雪翻崩舟師亦  
無苦老子悲震驚此語真不遷我懷諒難勝從容把卮

酒坐對離騷經起見皖山曲沉沉夕煙生開簾待明月  
穩聽波瀾聲

松下


兀兀皆禪刹亭亭歷萬坡蟬聲引我思得蔭亦浩歌蕭  
瑟美風日顧瞻愛松蘿收得物外趣悠然養天和

蜂兒

吳蠶為人織烹蛹以充腸况爾止工螫焚巢何足傷幸  
與衆果俱得陳君子堂咀嚼任所宜故毒難自防

加祿道中

僕夫疲躓復小休  
晴雲澹澹更悠悠  
村陂無人鳥聲樂  
澗草不動春風柔  
長道此去星斗近  
後期南來桑柘稠  
懷哉吾祖不溫席  
老矣長卿今倦游



清江三孔集卷六